

AIR ARUBA A ENTREGA DI DOS DODGE DAKOTA



ORANJESTAD (AAN): Riba e parkinglot dilanti edificio principal di Air Aruba na Wayaca, a tuma lugar entrega di e di dos Dodge Dakota Pick-up na e ganadora di e campaña "Bula y Gana".

E ganadora ta señora

Glenda Djaoeng, y el a ricibi e yabi di e fabuloso vehiculo aki for di man di Nelson Croes di Air Aruba.

Croes a anuncia cu e campaña ta sigui, y nan di tercer Dodge Dakota lo worde rifa Diadomingo 13 di December

venidero, durante un Family Day special pa nan empleado- y invitadonan riba parkinglot di Air Aruba.

Visiblemente por a nota cu e ganadora a keda contento cu e bunita Dodge Dakota aki. Masha pabien.

Josy Mansur:

FLOR DI SHOSHORO

Un bunita coleccion di poema

ORANJESTAD(AAN) Ayera mi tabata tin e privilegio di ricibi for di e autor, Dominico Marquez, su buki di poema titula "Flor Di Shoshoro". Imprimi na Aruba, e ta consisti di 55 pagina di poemanan agradable, yen di simbolismo y un filosofia pragmatico di bida.

Fuera di ta domina e esencia mes di poesia, e autor ta haci gala di un lenguahe puro, simple y atractivo: "Ami ta sin cuminzamento y sin fin; ami ta mas bieu cu tempo; ami ta mas jong cu dia; di mi tur cos ta brota, na mi tur lo regresa."

"Flor Di Shoshoro" ta un contribucion mas na e literatura naciente di Aruba, skirbi cu un bon sentido di imagen y ritmo, y un amor profundo pa nos isla y su cultura. E buki ta contene tambe un poema di Aster Marquez titula "Calor y Amor", cu ta un añoranza pa e amor, comprension y seguridad obtenible principalmente cerca mayornan. Skirbi cu hopi honestidad, e ta un alabanza di loke ta limpi y deseable den bida.

Dominico Marquez, den un di su poemanan, ta evoca e esencia di cultura. Den un conhunto di imagen, e ta simboliza progreso di cueba pa choza, pa cas di torto, pa cas di tabla, pa cas di bloki, pa un mansion. Idem pa e tipo di cuminda cu ta bay di matanan di mondi te caviar, y na final, un filosofia basico "cultura ta e cuminda di ayera, cultura ta awa cu a yega lama, cultura ta e garoti di e pover, cultura ta solamente....memoria."

Dominico ta cera e buki cu un poema titula "Yudami Muri", cu ta recoge e dolor di biba sin ilusion, di soporta dolor pa e solo hecho di no por evite, di busca alivio mas aya di morto, di puntra e pakico di tanto sufrimento. Tuma como un conhunto di diferente pensamiento tocante sociedad, di expresionnan diverso relaciona cu sentimento, di avaluonan constante di e balor (o falta di dje) di bida, "Flor Di Shoshoro" ta un coleccion di poemanan bunita, skirbi den un idioma puro y simple, cu ta resalta e rikezanan expresivo di Papiamentu.

Nos dushi Papiamentu, cu ora e ta bon skirbi, manera den e buki di Dominico Marquez, ta canta cu e tononan melodico di un manantial fresco, y e coreto di awanan cristalino cu ta crea nan propio notanan musical.

Flor Di Shoshoro



Poesia y cuentanan
pa
Dominico Marquez

INVITACION

DOWCO "BO PACUSNAN DI CONFIANSA" TA PRESENTA SU MODESHOW DI FIN DI AÑA

AWE DIARANSON

7:30 - 8:00

WAAK NOS PROPIO
EMPLEADONAN Y NAN YIUNAN
LO MODELA NOS COLLECCION
NOBO DI FIN DI AÑA.

DOWCO

CURA CABI * ORANJESTAD * SANTA CRUZ * SAN NICOLAS